

吉安府志卷十三

秩官志

府名官

統轄名官

連

廬陵泰和吉水三縣

吉安府名宦

漢孫輔

吳呂岱

晉虞潭

孟嘉

郭泰

王鎮之

宋沈邵

齊裴昭明

梁傅昭

陳陸子隆

劉竺

唐杜審言

顏真卿

令狐峘

姜公輔

張宏靖

吉安府志

卷十三

秩官志



田陽 蕭芮

南唐 王崇文

宋梁鼎 馬應昌 向敏中 李寬 余靖

藍丞 魏綸 吳華 李璆 呂源

李彌遜 鄭作肅 葉仁 謝諤 胡長卿

王居安 趙希言 趙汝愚 趙善諫 范應鈴

陳緯 張宗周 葉夢鼎 陳克莊 江萬里

倪普 李芾

元岳天禎 張懋 張翥 吳繹 梁克中

明朱叔華 莫己知 朱仲智 藺芳 邢麟

陳本深 胡春同 張瑄 鄭鋼 程宗

歐陽伸 趙一璧 張本 陳茂烈 張醜

尹綸 伍文定 黃宗明 危嶽 靳學顏

陶大年 劉廷賓 張元諭 黃大廉 樂文解

張振之 余之禎 汪可受 朱鴻謨 吳士奇

顧四明 陳鳴暘 余玉節 邵夢河 洪啟遵

國朝 李興元 閻毓偉 郭景昌 龔其裕 蔣維藩

羅京 趙士驥 林逢春 吳銓 鄭疇

徐亨時 黃文則 呂肅高 符乘龍 王銘琮

盧崧 張敦仁 劉體重 李鎔經 陳源亮

劉拱辰 王本梧 陳宗元 曾省三

統轄名宦

宋張齊賢

元王良

明陳憲

林瑜

周用

汪一中

龔道立

黃承元

彭期生

國朝施閏章

周玉衡

蓮花廳名宦

國朝黃增歷

李其昌

德起

廬陵縣名宦

唐張儼

宋姜遵

陳異

程珮

陳汝器

黃疇若

冷應澂

龔日升

元秦思

管文通

韓家奴

寶童

明王泰

李景南

劉灝

陸謙

孔文英

朱幹

張源

費鎧

段敏

柳尙義

王守仁

傅頤

袁袞

朱登

梁以衡

錢一本

莊祖誥

明時舉

陸康稷

張昂之

關捷先

國朝張文熹

劉愈炤

于藻

成績

陳復新

陸在新

劉廷瑛

曾璧濤

涂宗震

王恩進

汪執桓

元克中

范元颺

郎昫

顧麟趾

楊曉昫

姚體備

泰和縣名宦

南唐張翊

宋戚綸 范應辰 呂士元 王陶 盛陶

黃庭堅 胡遵道 蕭伯原 劉栲 陳則

方師尹 蒲堯仁 陳秀實 趙蕃 趙師爽

卓洵 趙汝暮 海鵬飛 趙友直

元何止爾赤 曾翰 達馬識禮 趙友直

明吳去疾 顧文昱 沈夔 劉昭先 陳能

郝思讓 徐遜 應承完 孫公與 吳勝祖

李吉 郭璘 徐麟 吳埜 曹彙

單信 奈耀 劉芳 孫暉 譚昇

王輔 陳穀 吳必顯 鍾雲 沈時

楊南金 陸震 李楫 周詔 王春復

馮叔吉 劉茂 孔永祐 吳大進 唐伯元

濮中玉 王元瑞 吳文瀛 鄭俊 冉棠

國朝顯孫堊 宋德馥 田惟冀 鄭俊 冉棠

沈衍慶

吉水縣名宦

劉張約之

宋葛源 蕭映 程師孟 歐陽賓 周郊

梅珣 蕭雅 徐若訥 楊獬 趙錫

王正 陳臧孫 李恕已 林半千 熊彥明

吳必大

元張楫

明馬德明 費震 李恒甫 錢本中 王文富

柯暹 蔣紱 李智 高陞 王俸

周廣 王激 許貫之 文嘉 蘇士潤

陳與相 徐學聚 黃流芳 沈裕 陳王輝

孫之益 溫臯謨 何應奎 萬煒 徐之垣

載應舉 王龍震 張開業 馮震 鄧嗣禹

朝王雅 朱行義 魯昇 陳銳 王崇

宋纘殷 韓侯振 徐大坤 寧保 朱廷基

張鰲 張彤標 章裕善

胡晉采

府名宦

後漢

孫輔字國儀獻帝建安初輔以揚武校尉與孫策平三

襲廬江太守劉勳降豫章太守華歆時策奉詔為討逆

將軍輔身先士卒表為廬陵太守輔撫定屬城分置長

吏遷平南將軍吳志

三國吳

呂岱字定公海陵人事吳主權拜昭信中郎將建安二十

年督孫茂等十將從取長沙三郡又安成攸縣永新茶

陵吏共入陰山城合眾拒岱攻圍即降三郡克定遷廬

陵太守嘉禾四年廬陵賊李桓路合會稽東冶賊隨春

南海賊羅厲等一時並起權復召岱督劉纂唐資等分部討擊平之歷官大司馬年九十六卒

摘吳志

晉

虞潭字思與會稽餘姚人吳騎都尉翻之孫也廣州刺史

王矩上潭領廬陵太守撫綏荒餘咸得其所又與諸軍

共平陳恢仍轉南康太守進爵東鄉侯尋被元帝檄使

討江州刺史華軼潭至廬陵會軼已平而湘川賊杜歿

猶盛江州刺史衛展上潭並領安成太守以禦之

摘晉書

孟嘉字萬年江夏人吳司空孟宗孫也嘉少知名冲雅有

遠量行不苟合言無誇矜太尉庾亮領江州辟部廬陵

從事嘉還都亮引問風俗得失對曰還傳當問吏亮謂

弟翼曰孟嘉故是盛德人後復為巴邱令

參通志豫章書

郭察武昌人永嘉中為安成太守五年益州流人汝班梁

州流人蹇撫寇湘州破零桂諸郡進逼安成察力戰死

之子翻家於臨川

盧志

王鎮之字伯重琅邪臨沂人初補剡上虞令並有能名內

史謝翰請為山陰令復有殊績遷衛軍參軍本國郎中

令以母老求補安成太守桓元將苻宏寇亂郡境鎮之

拒戰彌年子弟五人並臨陣見殺母憂去職在官清潔

妻子無以自反乃棄家致喪還上虞舊墓畢為子標之

求安復令隨子之官

採宋書補

宋

沈邵字道輝吳興武康人宋太祖以舊恩召見彭城王義康出鎮豫章被廢徙安成以邵為安成相在郡以寬和恩信為南土所懷慰卹孤老勸課農桑郡民王孚有學業志行見稱州里邵莅任未幾而孚卒邵贈以孝廉元嘉二十六年卒時年四十三上甚悼痛

摘宋書自序

案舊志及江西通志錄劉湛傳今刪辨見前府職官條內

齊

裴昭明河東聞喜人裴駟子齊建武初為廬陵太守明帝代還責以無所啟奏昭明日臣不欲競執關鍵故耳昭明歷郡皆清勤嘗言人生何事須聚富一身之外亦復何須故終身一不事產業中興二年卒

摘豫章書

梁

傅昭字茂遠靈州人天監中由左民尚書出為信武將軍安成內史安成自宋來兵亂相接郡多鬼怪及昭為郡郡人夜夢見兵馬鎧甲甚盛又聞有人云當避善人眾軍相與騰虛而逝自後郡舍遂安咸謂昭正直所致郡溪無魚或有暑月薦昭魚者昭不納魚餒於門側

梁書盧

志案云安福志載郡嘗設穿陷虎昭曰人不害物物亦不害人命撤之虎亦不為患案舊志及江西通志錄江革傳今刪辨見前府職官條內

陳

陸子隆字興世吳郡吳人陳天嘉二年除廬陵太守時周迪據臨川反東昌縣人修行師應之率兵以攻子隆其

鋒甚盛子隆設伏於外仍閉門偃甲示之以弱及行師至腹背擊之行師大敗因乞降子隆許之送於京師四年周迪引陳寶應復出臨川子隆隨都督章昭達討迪迪退走因隨昭達踰東興嶺討寶應子隆功最封朝陽縣伯摘豫章書

劉竺字世泊彭城人爲廬陵太守沈幾博照利興害除民歌曰公家無負租私室多餘粟出郊有白鹿隨馭之祥民懷惠政立祠神岡山豫章書

唐

杜審言襄陽人擢進士累遷洛陽丞坐事貶吉州司戶參軍崇尙文雅優禮儒士一變風俗司馬周季重司戶郭

若訥構其罪繫獄將殺之季重等酒酣審言子并年十三襲刃刺季重於坐左右殺并季重將死曰審言有孝子吾不知若訥故誤我審言免官還東都蘇頌傷并孝烈誌其墓劉允濟祭以文後武后召審言授著作佐郎遷膳部員外郎神龍中坐交通張易之流峯州入爲國子監主簿修文館直學士卒吉州人建詩人堂祀之唐參

書府舊志

顏真卿字清臣京兆人永泰中謫爲吉州司馬士民懷之立祠祀焉今溪山深處往往有其石刻題詠或謂吉州多忠節士蓋魯公流風遺俗云著有廬陵集十卷盧志

令狐峒宜州華原人貞元初貶吉州別駕以治績授吉州

刺史齊映為江西觀察使行部至吉州峒入謁從容步
進不秣首屬戎器映深以為憾映還奏叵政過失貶衢
州別駕順宗立以祕書少監召未至卒元和中贈工部

尚書參唐書

姜公輔日南人貞元八年擢吉州刺史歐陽守道曰姜公

以故相來刺吉州而新舊史不同吾廬陵尚論其治以

為有君子之澤存焉廬志案舊唐書本傳云貶泉州別駕順宗即位起為吉州刺史尋

卒新唐書本傳云順宗立拜吉州刺史未就官卒故歐陽守道作三賢祠記有云姜公以故相來而新舊史不

同蓋莫詳其至否亦疑姜公未果至吉州也本不宜立傳此傳廬志乃本萬歷府志今姑仍之吾廬陵以下為

萬歷間修志者之語當屬附會又順宗在位一年建元永貞此傳及府職官條下作貞元八年來任亦誤

張宏靖字元理河東人歷刺縉雲潯陽用清白之治詔書

寵褒賜以金紫元和間移涖吉州凡事從宜處約吏民

得職威令神行未及再葺富庶而教至於無事百姓扶

老攜穉載路而歌廬志採皇甫湜記

田陽字昭和大中間任吉州刺史留心撫恤物阜民和卒

於官臨終與子訣曰吾死不忘護吉州之民子感其言

因家於吉之城北州人立廟祀之今府南關有田公廟

蕭芮長安人乾寧進士任吉州牧養民以仁待士以禮政

平訟理結菴金鳳山岡講老子書自號蕭道人既解任

州人即菴為之立祠水旱疾疫必禱焉以上廬志

南唐

王崇文字光福吳功臣綰之子性重厚儒雅博綜經史尚

烈祖妹廣德公主出為欽吉二州刺史吉州民多爭訟古稱難治崇文奉法循理無所侵撓吏民便之遷虔州

節度使馬令南唐書 盧志列宋今改列南唐通志本傳作建隆時為吉州刺史誤也盧志沿其誤案南唐書本傳遷虔州節度使下繼云建州初平崇文鎮之考建州之平在保大三年崇文刺吉州當在昇元間

宋

梁鼎字凝正益州華陽人太平興國八年進士端拱初通判欽州以能聲聞詔徙知吉州里有蕭甲者豪猾為民

患鼎暴其凶狀杖脊黥面徙遠郡太宗賞其強幹宋史 盧

志案云一統志以鼎為太平興國間知吉州誤

馬應昌至道間以右司諫來守廬陵鞠貪胥絕欺弊公私舊通官緝表奏折入吏民賴焉通志

向敏中字常之開封人太宗時通判吉州與顏真卿媲美

周必大曰吉大州也其為貳則唐顏魯公以謫至本朝

向敏中以德選盧志 案宋史本傳云太平興國中進士解褐將作監丞通判吉州太平興國

乃太宗年號此傳原文作真宗時倅吉州誤也今正之

李寬字伯強慶歷間知吉州承詔立學學徒常三百人又

嘗施方畧捕盜賊凡米鹽酒榷皆為民除弊致利通志

余靖字安道曲江人慶歷五年以右正言知制誥出知吉

州恤民疾苦嫉豪健吏民賴以安其謝表云詢細民之

疾苦去健吏之刻削甫一載卒踐其言參豫 章書

藍丞熙寧間守吉州時朝廷議行新法丞不欲病民以年

老乞致仕通志

魏綸字君俞壽春人元豐六年詔知吉州至則引見官吏

問救弊所先下氣教民諭以苦語獎拔材能招勸不勉

按州左右曹三獄累械至三百餘人綸裁遣而去其二

人氣以和芝草產獄門東又產郡室及西峯寺秀野亭

泰和縣令黃廷堅為作三秀亭記盧志

吳革元豐間知吉州先是郡增鹽課二百萬民已失生理

前知州魏綸復上諸縣增課九十五萬革至盡罷之元

祐初御史按察以革治為江西第一明一統志 盧志 案云宋史吳革傳

係華陽人欽宗時官閤門宣贊舍人無知 吉州事且時代與此相去甚遠自是兩人

李瑒字西美汴人政和進士紹興四年以集英殿修撰知

吉州時江西兵剽悍瑒始視事有相挺為亂者亟捕誅

首謀撫循其餘大布恩信境內遂安

呂源紹興間知吉州增壘浚濠嚴城設守吉之城池至是

始備

李彌遜字似之蘇州吳縣人登大觀三年第性讜直輔臣

有不悅者紹興間以直寶文閣知吉州陛辭帝曰朕欲

留卿大臣欲重試卿民事行召卿矣七年多惠政遷起

居郎

鄭作肅紹興間知吉州催科以止不阿時宰以病民秩滿

還朝論吉州失陷船纜錢事坐不法置獄會秦檜死得

免

葉仁紹興間知吉州疾吏員冗濫乃按格律裁定其額且

刻石以告後人莫有敢易之者以上宋史

謝諤字昌國臨江軍新喻人以峽州夷陵縣主簿攝撫州

樂安尉選行縣事有治辦聲改吉州錄事參軍囚死者

舊瘞以蘇往往暴骨諤白郡取船官棄材以棺斂之郡

民陳氏僮盜其篋以逃有匿之者陳於官詞過實反為

匿僮者所誣帥龔茂良怒欲坐以罪諤為書白茂良陳

氏獲免茂良亦以是知之歲大祲饑民萬餘求廩官吏

罔措諤植五色旗分部給糶頃刻而定後擢監察御史

採宋史補

胡長卿紹熙間守吉州先是太守江少虞置貢院於州西

北糖倉巷試者纔三千人乾道淳熙以後試者凡萬餘

人往往有蹂踐之患長卿至與教授晁百談相視西北

水軍廢營以廣之形勝倍昔仕進日顯士咸德之盧志案

紹熙舊訛紹興今改正紹熙四年楊萬里有錢提刑寺丞胡元之持節桂林詩蓋即長卿也

王居安字資道黃巖人淳熙進士以集英殿修撰出知隆

興初盜起郴州黑風峒羅世傳倡首勢張甚李元勵陳

廷佐等亦並起四出掀永新撤龍泉江西皆震朝廷調

江鄂兵屯衡贛吉州兵駐龍泉吉守率師往幾為賊困

遂以居安為帥居安致書曉都統制許俊遂督戰於黃

山勝之獨吉守以戰不利用招降之策遣吏持受降圖

來書賊偽銜居安曰賊玩侮若此猶謂國有人乎白諸

朝吉守以祠去遂命居安節制江池大軍駐廬陵督捕

兼領郡事會元勵執練木橋賊首李才全至居安厚待才全而賞元勵羅世傳疑元勵貳已遂交惡元勵率眾攻世傳居安語俊曰兩虎鬪於穴吾可成示莊之功矣世傳喉練木橋賊襲元勵擒元勵以獻磔於吉州之南門世傳負功驕蹇名效順而實自保無何與兄世祿俱叛居安遣官兵合圍之世傳自經死斬其首以徇羣盜次第平居安在軍賞厚罰明始終用以賊擊賊之法故兵民無傷江西諸郡皆祠祀之參宋史豫章書互詳武事

趙希言字若訥惠王令應元孫淳熙十四年登第調衢州司戶改吉州司理屬邑有誣人以殺人罪者吏治之急囚誣服希言鞫得實檄縣他捕乃得真盜用楊萬里周

必大薦授臨安府司法

宋史 豫章書此傳全本宋史盧志注豫章書今改注宋史

趙汝愚字子直宋宗室居餘干有大志每日丈夫得汗青

一幅紙始不負所生擢進士第一孝宗時除江西轉運

判官寶慶元年權知吉州以券緡五百修葺學宮重建

藏書閣後官至右丞相為韓侂胄所構謫永州道卒盧志

案云汝愚為宋貴戚忠臣本傳僅載其除江西轉運判

官寶慶初修吉州藏書閣見楊萬里記而國朝學使

沈翼機學記併詳其修州學正殿則汝愚亦吉州名宦

也宋史失載舊志亦失攷特據楊記於學校補網增入

職官表中併立傳

趙善諱慶元間守吉州政先無告嘗於具慶坊置慈幼院

收恤孤弱命貢士王子俊許景陽等分纂入縣志以附

於周必大郡志之後由是吉之文獻彬彬足徵通志

范應鈴字旂叟豐城人開禧元年舉進士調永新尉縣當龍泉茶陵溪峒之衝寇甫平喜亂者紛相驚擾應鈴廉得主名粹而治之縣十三鄉寇擾者不時安撫使移司兼郡初奏弛八鄉民租二年詔下如章既而復催以檢核之數應鈴力爭不從即詣郡自言反覆數四帥聲色俱厲應鈴從容曰某非徒為八鄉貧民乃深為國家耳民貧迫之急將以不肖之心應之租不可得而禍未易弭也帥色動令免下戶既出令復徵之應鈴歎曰是使我重失信於民也又力爭之訖得請民大感悅有大姓與轉運使有連家僮恣橫厲民應鈴笞而繫之獄郡吏庭辱令應鈴執吏囚之以狀聞調衡州錄事後差知吉

州其時江右峒寇為亂吉州八邑七被殘燬應鈴下車以練兵足食為先務然後去冗吏覈軍籍汰老弱以次罷行永新禾山羣盜嘯聚數日間應者以千數應鈴察過客趙希邵有才畧檄之攝邑調郡兵結隅保分道擣其巢穴誅其為首者七人一鄉以定顛叛卒朱先殺主帥應鈴密遣諜以厚賞捕之部使者劾其輕發鑄一官閒居六年起廣西提點刑獄採宋史補陳緯台州人由太常丞出知吉州敬禮丞相文天祥天祥嘗與之書有蒙福凡十萬家民歌載路薦人至二千石相譜滿門之句及由吉州遷福建司倉復遣書云天啟九遷民爭二境人懷惠政帝有恩言奪南國之二天遺

東甌之一佛其推揚如此摘豫章書

張宗周字鎬西廣東英德人紹定進士官祕書省架閣文

字時賈似道誤國上章歷詆其奸謫吉州劄二年乞休

聞嶺南兵變道梗遂占籍萬安建祕書閣於所居之渡

頭先是為祕書時與文天祥友善及退休天祥過訪因

謂曰君休矣而閣猶名祕書非所以明恬退也乃親書

晚翠樓易之盧志

葉夢鼎字鎮之台之寧海人淳祐六年權知袁州十一年

江西提舉常平兼知吉州節制悍將置社倉義倉平反

李義山受賊之寃寶祐五年差知贛州六年文知隆興

府採宋史補案宋史歐陽守道傳有云吉有賢守而大家怨之厚誣以賊下其事常平使者所稱賢守當

指李義山也

陳克莊字潛夫莆田人淳祐進士官祕閣修撰以詠落梅

詩忤時相謫居真德秀薦起佐吉州以書謝政府畧云

送窮無路遂致籲天起廢佐州且為擇地擢以治中之

近次處之江右之名邦永戴洪慈求堅素守仕澹菴誠

齋之里所願服膺誦清渭南山之詩未忘回首讀者美

之人吉州與王實之同官作宴吉倅王實之詞亦云想

像醉翁澹菴之勁節高風收拾平園誠齋之殘篇斷橐

信此行之不惡然小住而亦佳且曰碧鷄金馬非吾事

白鷺青原欠子詩在官以文采風流佐治具郡人士多

依之摘豫章書

江萬里字子遠別字古心都昌人淳祐間以著作佐郎出知吉州州城東有白鷺洲萬里即洲創書院選俊秀肄業其中為治首先德教由是絃誦相聞遷江西轉運判官兼權知隆興府累官左丞相後州人與山長曹奇建祠於書院祀之顏曰古必祠春秋祭祀弗替參宋史舊志倪普金華人知吉州為政以風化為先嘗曰國之存亡民之死生寄於士大夫人品之高下世道由以重輕也州學舊有顏魯公祠普增祀姜公輔余靖名三賢祠人以為知治體通志

李芾字叔章衡州人以廕補吉安司戶咸淳間知吉州嘗以忠節自負於州城南立四忠一節祠禮鄉士夫與文

天祥相契合尋得罪賈似道免官去後起知潭州元兵

逼城舉家赴難死諡忠節摘豫章書

元

岳天禎大名冠氏人岳存之子襲父職以平賊功授福州路總管平尤溪賊秩滿改吉州路總管討平永新賊後

遷贛州元史岳存傳

張懋字之美涿州范陽人世祖至元十六年授吉安路總管惡衣糲食慎刑平政新府治設義倉部使者劉宜驢之凡有所懲治朝至夕報豪強竦然郡萬戶蘇良恃勢為暴為之翼者有十虎之目民甚苦之乃上其實於憲府盡誅十虎奪良虎符而黜之民大悅羣盜將率眾白

晝劫城懋聞之率從騎擣其穴縛其酋長以歸民之流
亡與遠郡之來歸者數千家相率為生祠以祀之十七

年二月卒諡宣敏元史懋字之美盧志作子美案懋父名子良懋當非字子美也今據史

正之又盧志於史文設義倉下憑添時亂初平於是人心甫定十字今刪

張翥濟寧人為吉州路總管時龍泉大筭出寇起翥收捕

之民賴以安陞廣東廉訪使

吳繹字思可信都人泰定間自杭移守吉州政有三善外

敏而內寬一也讀書知治體二也好謀而善斷三也

梁克中為吉州路總管四境盜起克中即移兵出鎮於郡

東大洲上修濠樹柵治營壘益募丁壯置舟師節制屬

縣義兵郡賴以安以上一統志

明

朱叔華至正二十二年陳友諒陷吉安以饒鼎臣守之明

太祖命朱文正遣裨將復吉安鼎臣出走以朱叔華知

府事明年五月鼎臣復陷吉安時江西參政劉齊與叔

華并守吉城被執俱不屈死之摘豫章書盧志案云至正二十二年壬寅距

明洪武元年戊申凡七年叔華奉命知府事死節自應表列明初併為補傳

莫已知鳳陽人洪武初知吉安府時天下甫定郡縣規制

率苟簡己知加意振刷興仆立踏煥然改觀持己廉介

待人慈惠民甚安之通志

朱仲智金華人洪武間知吉安府寬厚廉介剗革吏弊刑

清政簡吏畏民懷修學校獎掖生徒彬彬向學移重慶

府吉民思之

豫章書

蘭芳夏縣人洪武中舉孝廉永樂初以刑部郎出知吉安府寬厚廉潔持大體明習吏治庭無滯牘民有告訐者數語立決吉水民詣闕言縣有銀礦帝遣官覆視父老遮芳訴曰闕宋季嘗有言此者卒以妄得罪今皆樹藝地安所得銀礦芳詰告者得實獄具以誣妄奏同官不肯署名芳請獨任之奏上帝曰吾固知其妄也事得寢芳自奉甚約日蔬食母甚賢芳日所治事暮必告母有不當母輒教戒之芳受命惟謹由是爲良吏吉安自芳去民思慕賢守以比仲智動稱朱蘭累官工部右侍郎

參明史及

豫章書

邢麟武陽人永樂中通判吉安府潔操守勤庶務御物和平人懷其惠楊士奇有詩云此日江西十三郡幾人清

潔似邢侯

盧志

陳本深字有源鄞縣人永樂初鄉舉宣德五年以刑部員外郎與况鍾等同授敕爲知府得吉安吉安多豪強好訐訟巨猾彭搏等橫閭里本深密遣人與相結爲具召與飲伏壯士後堂猝起拉殺之皆曳其屍以出一府大驚樂安大盜曾子良據大盤山眾萬餘本深設伏大破之斬子良本深爲政舉大綱不屑苛細大猾旣殲府中無事每晨起鼓而升堂吏無所白輒鼓而休間有所訟呼至榻前析曲直遣之亦不受狀有抑不伸者雖三尺

童子皆得往白久之民恥爭訟尤折節士人飾治學宮
奏新先儒歐陽脩周必大楊邦乂胡銓楊萬里文天祥
祠廟正統六年滿九載當遷郡人乞留詔予正三品俸
廨前民嫁女本深聞鼓樂聲笑曰吾來時乳下兒也今
且嫁尚留此耶遂請老前後守吉凡十八年既去郡人
肖像祀之參明史通志

胡春同漳州人宣德間為府學教授操履端方學問淵博
迪諸生語恂恂惟恐不盡其意以身示教九邑人士皆
矜式之後以疾卒於官廬志

張瑄字延璽江浦人正統進士景泰時為吉安知府俗尚
巫迎神無休日瑄遇諸塗投神水中瑄遭危疾父老皆
言神為祟請復之瑄怒不許疾亦愈歲大饑陳牒上官
不俟報輒發廩賑貸居八年以薦擢廣東右布政使歷
官南京刑部尚書通志

鄭鋼蘇州人天順間為府學教授文行兼備以敦德義薄
榮利為教生徒咸傾嚮之廬志

程宗常熟人天順五年知吉安府才敏而不務苛察胥吏
舞文者釐革殆盡嘗語健訟者曰汝能枉其是非以欺
我耶汝將害人適自害耳郡中感化訟息尤篤意學校
勤督諸生罔有厭怠通志

歐陽伸廣西馬平人景泰鄉舉宏治元年由鎮江府推官
陞吉安同知時知府顧福吳縣人亦新蒞任知其在鎮

江時廉潔無私讞獄平允捕獲劫盜釋富民冤政績炳炳遂引以為助而虛己下之佐吉數載亦如治鎮江士民誦之

趙璧昆明人宏治三年通判吉安府性軒豁持已嚴待物

恕凡催科務寬恤尤雅尚文學士民悅服

以上盧志

張本錢塘人宏治間由進士知吉安府下車首擊武斷豪

惡數人強暴斂跡鄉民有隙輒聚眾持挺至千人殺傷

無所憚本奏請聚眾十人以上者俱發遠戍民始警惕

不敢犯表著節義請建楊士奇劉子輔譚節婦祠其為

治知先務類如此

通志

陳茂烈字時周莆田人宏治進士授吉安府推官簡重端

潔動必以禮為治持大體開至誠通以民彝之懿訟牒

堆案從容推鞠不假聲色筆楚而姦黠者自無所容豪

家利寡婦財誣許婚斷從守志有悍妻嫁有娠妾既生

子歸承其業族人爭之驗與子類爭者愧服時郡守嚴

擊豪強徐輔以寬當道尚深刻徐開解得寬霽信孚上

下吉人謠曰要無冤對陳言擢御史以母老乞終養家

貧不能自給有司以聞詔給月廩三石母卒哀慟失明

尋亦卒部使請於朝建孝廉坊以表之

參豫章書通志

張醕字宗厚合肥人宏治中由進士知吉安府清心寡慾

事不煩而民不擾自奉甚薄時勤民事日不暇給胥吏

抱文書立庭下如木偶人革富民隱射之弊差役為均

解舍多圯撤而新之百廢具舉歷官至都御史

尹綸直隸深州人宏治間為吉安推官廉介明恕敷政公

平值歲旱嘗露禱致雨捐俸以給貧民以治行召入為

監察御史以上盧志

伍文定字時泰松滋人宏治進士正德間以才任治劇由

河南府調知吉安精敏有遠畧慷慨持大義守吉之三

年以計平永豐及大茅山賊佐南贛巡撫王守仁平桶

江橫水諸峒會宸濠反吉安士民爭亡匿文定斬亡者

一人眾乃定遂迎守仁會兵於臨江樟樹鎮討賊守仁

定策先攻南昌文定身先士卒遂復省城宸濠在安慶

聞變急引兵還先鋒已至樵舍守仁率文定以兵當其

前濠師乘風鼓譟而下進逼黃家渡文定佯北誘之與

諸軍還兵合擊大敗濠師次日濠併力合戰官兵敗死

者數百人文定急斬先却者以徇身犯矢石火燎鬚鬢

不移足又為火攻之具贛州知府邢珣擊其左袁州知

府徐連臨江知府戴德孺擊其右分兵四伏明日奮力

合擊之執宸濠及其世子併偽官屬入江西賊平功最

擢江西按察使官至刑部尚書諡忠襄參明史鄒東廓集盧志案云

豫章書載文定父伍琇天順間知吉州有惠政舊志職官表失載今補入又稱文定知河南府適華林巨寇曾得瑞等蹂躪諸郡改守吉安文定詢知姦謀履任即誅其首惡五十餘人合境瞻落尤關郡績摘出附見

黃宗明字誠甫一字致齋鄞縣人正德九年進士歷官刑

部郎嘉靖間出守吉安潔已愛民不畏強禦有勢家窩

盜毒害地方密捕之寘於法郡民以安尤振興文教以白鷺洲書院爲宋州守江萬里造士所創亟爲修復構講堂號舍召九縣士講覈經義給膏燭費尋擢去歷陞

禮部侍郎

鷺洲志

危嶽字季申黔陽人嘉靖間進士爲吉安推官剛毅有節操不因貴勢而撓署安福篆縣苦虛糧嶽開故籍詢土宜盡得蠹吏爲奸根株力行丈田嘗單騎入山谷間履畝抽丈及病不能支猶集羣冊於縣之元妙觀以督其成竟卒於官囊篋蕭然無以爲殮士民哀之爲編遺愛

集

參通志東廓敘

靳學顏字子魚濟寧人嘉靖進士爲吉安守始下車罷諸

供具與期會條教刑無妄施獄不濫繫未數月郡以無事久之民役於官者如在野細民無復以事私謁府中吏者吏皆蕭然無他營郡中巨族造請必正色拒之嘗有乞佃寺地者學顏曰職守土固不能以地與人廉知境內砥節自重之賢敬而延訪之官至吏部侍郎

參豫章書

陶大年字長卿會稽人嘉靖十八年進士以南京兵部員

外郎出守吉州時巨盜劉某侵暴鄉邑令莫能制大年至捕得之寘重典四境以安有貴要倚勢殺人當路書紛至求寬假竟論如法爲政嚴明方正絕私交罷行戶

四載遷山東副使

分省人物攷

劉廷賓南海人嘉靖間通判吉安樸儉無欲爲政方直絕

請託嘗攝安福事時民間苦役廷賓簡易民當甲者至不費一錢捕劇盜搜獲金錢封識歸公帑秋毫不私家故貧廨舍蕭然泊如也擢泉州同知參通志

張元諭字伯啟江浦人嘉靖間進士知吉安慈愛果敢凡所當行不以人言利害中止拊循四境終歲不聞追呼聲巡按某委以訪緝元諭廉得其人無辜竟宥之嶺南盜犯江西將及郡境元諭登城捍禦遣人給以牛酒招諭之遂一無所擾官至雲南按察副使

黃大廉字潔甫福建莆田人嘉靖進士為府學教授每接諸生雖燕見不以褻服與諸生言論必援引古人終日無倦容課試以經義為先行文險怪及浮靡者必痛抑

之居民侵廟門外地言於郡復其故址捐俸豎振文坊

陞國子助教官至貴州布政司參議以上盧志

樂文解字廷冠隆慶六年以貢授吉安訓導從羅洪先講

學與語忻然曰吾老友也署廬陵縣事值歲飢著救荒

解上當道行之縣賴不困參福建通志

張振之字仲起太倉人嘉靖進士萬歷初知吉安諭屬縣

省耕課桑禁溺女及停喪不葬迎神張燈競渡之習民

間妖會號無為教禁絕之逐倡優不得入境治獄主於

矜恕不入贖大辟重戍多從末減繕築敵臺以固城守

構廬陵學時雨樓創永新忠節祠以風多士刻朱子年

譜及羅欽順困知記以崇正學治郡三年遽棄官歸尋

起官至浙江按察副使

參豫章書

余之禎內江人進士萬歷間知吉安百廢俱興察民隱雪冤獄時郡城內外多火災之禎建火神廟於山川壇側禱之自是火不為患尤崇尙正學鄉紳王時槐陳嘉謨講學西原會館之禎敬禮之嘗至會館論學增修府志至今資考核云

盧志

汪可受字靜峰黃州人萬歷進士知吉安興學校建復白鷺洲書院築吉臺永堤以防水患興復二程祠以羅倫羅欽順配更集歷代郡人理學忠節名臣建三坊立祠祀之造條鞭法樹碑郡門云官壞此法者官不職民梗此法者民弗良書吏舞此法者遣定爲例

參通志

朱鴻謨字文甫益都人隆慶進士萬歷間授吉安推官識

鄒元標於諸生厚禮之署篆泰和禔躬清介去住市米自給嚴屏里甲備辦常供俸羨傾賑貧儒嘗曰吾身旁儲銀五銖輒病其大廉不賺殆天授然也歷官刑部右

侍郎贈刑部尙書諡恭介

參豫章書通志

吳士奇歙縣人進士萬歷間知吉安清慎勤敏前知府汪可受所建理學忠節名臣三坊士奇爲著白鷺書院三不朽志抑揚咸得其當好接引士類著有史裁行世

顧四明山東人進士知吉安清操自持愛民禮士郡學博

劉錫元嘗曰顧公署多糟糠少膏粱

陳鳴暘溧水舉人天啟間任吉安同知敦樸廉能攝府事

試士拔寒畯甲子鄉試獲雋獨多署九邑事幾遍既去
人稱為長者以上
盧志

余玉節字振衡大冶人萬歷進士知吉安講求馬驛漕艘

為畫一之法以蘇民困時欲廢白鷺洲書院改建魏忠

賢生祠玉節力存之妖賊肆逞兩臺奏留為布政司參

議單車就道簡將士足糗糧嚴斥埃方略出奇屢劾賊

鋒擢南贛巡撫竟以勞瘁卒參湖廣
通志

邵夢河廣東人崇禎間任吉安通判署安福縣事時張獻

忠寇陷郡縣將及境夢河慷慨登陴飭守禦勢不可支

城陷罵賊不屈死民得餘骸殯之建忠節祠通志

洪啟遵字素原福建泉州人進士崇禎間任吉安推官耿

介果敢不畏強禦民有冤抑白於府自理之犯者雖貴

勢必寘於法無敢有請託者署吉水令多政績後擢臺

諫有聲盧志

國朝

李興元直隸遵化人貢士順治八年知吉安值戊子寇變

後郡城寥落興元至拊恤瘡痍營繕府廨興修學宮建

明倫堂重新鷺洲書院修府志盧志

閻毓偉字真望夏縣人順治九年進士授吉安推官吏捕

礦徒多人應論死毓偉廉得其情寘首於法餘盡釋之

以廉敏入為吏部主事山西
通志

郭景昌字瑞旭遼東瀋陽人貢士康熙三年來守吉安時

郡縣多盜又軍戶運漕多振累民深患之景昌減騎從親歷屬邑察民間疾苦得首盜二十餘人悉肆於市約胥吏丈田畝清軍戶減漕艘復淮鹽捐建府堂增修鷺洲書院與守道施閏章鄉紳張貞生講學其中又於仁壽山景賢書院延山長捐膏火屬知縣于藻爲廬陵縣義學釐正祀典首葺學宮創修府城隍堂宇站前關帝廟以擢去士民建祠祀於南街自正月朔至七日合祀名曰郭公會

龔其裕字容溪福建閩縣人貢士康熙十四年以平寇功由瑞州通判陞吉安知府時城已爲逆將韓大任所踞其裕至駐兵螺子山逆將深濠堅壁相拒歲餘其裕以

計破之乃引兵夜遁其裕入城撫定郡民保聚有方初城陷逆將殺人遍野骸骨暴露其裕捐貲給僧令悉瘞埋撫瘡痍如不及兩府皆祀名宦

蔣維藩字价人鑲紅旗漢軍舉人康熙十七年知吉安自十四年城陷後所在山寇肆劫維藩單騎詣賊營諭以禍福就撫者數萬人亂後民苦饑捐米千餘石設粥賑之試士剖晰經義發明程朱之奧士風丕振

初知吉安
與此互異

案通志本
傳作順治

羅京字周師會稽人康熙二十七年守吉安臨民如家人婦子所過鄉村必招父老子弟語以慈孝和睦節用省事九邑屬吏皆化焉府城西南隅正南門面神岡山爲

門最古顏曰興賢萬歷間易之京修府學宮遂毅然從
郡人請改復如初鷺洲書院自十四年乙卯毀於寇京
併復舊規於書院理學祠增祀前明理學陳素謨王時
槐賀沚以崇實踐大集九縣士肄業其中各給膏火守
郡六年士民愛戴去後建羅公祠於督學試院東祭祀
不替

趙士驥字秀良一字瞿菴河南永城人進士康熙四十八
年知吉安甫下車令行法立訟清政舉尤興學造士治
郡三年民無爭鬪聲士不訟公庭大吏上其績晉秩監
司九邑共立祠督學試院西以祀顏其門曰琴鶴清風
林逢春字貞巖福建晉江人康熙五十二年由部郎出守

吉安構書室顏曰惕心居公餘正襟危坐其中默思已
過適洪水鄉城多被浸沒親率屬集小艇懸賞救援水
平畫策賑濟甫二年以憂去郡人建林公祠於廬陵縣
署東街歲時祭祀顏其堂曰寒潭秋水

吳銓江南上海人雍正二年知吉安郡自康熙五十二年
水災後繼以饑饉民爲盜者輒監禁盜日充斥銓下車
清理庶獄出輕罪者百人盜皆感泣自是竟無盜患脩
文廟重葺鷺洲書院增建書院門牆葺道心堂兩旁翼
以號舍五十間郡士絃歌聲始復舊

鄭疇字錦峯山西五臺人進士雍正五年由翰林檢討出
守吉安下車採納風謠稔知民間疾苦居數月釐奸剔

弊鋤暴安良大吏徵治瑞州命案嘻平情擬之皆伏罪
部議以故出請罷嘻閒居古城會苦旱士民環嘻舍請
禱嘻步行烈日中自金牛寺遠府城隍廟翼日果大雨
如注郡人建甘雨亭於金牛井上旋復任聞報日甘霖
再沛遂創建龍神廟於金牛寺旁增正南門爲煥文門
合郡感嘻功德奉嘻主祀金牛寺

徐亨時字敬亭浙江錢塘人雍正十二年知吉安甫下車
從輿望建復興賢煥文二城門先是雍正十年前守令
廢二門別開南薰門民出入苦之至是乃復舊又重修
學宮清復鷺洲田租優給肄業生膏火捐製祭器祀書
院先賢先儒時署廬陵縣裴玉麟同心佐理郡人爲之

歌曰徐公裴公志合心同撥開雲霧紅日當中

黃文則字樸園建昌新城人進士乾隆三年任吉安府學
教授掌鷺洲書院教發明六經諸史之蘊九邑有志之
士始知不專務詩文究心實學以保薦擢貴州印江令
呂肅高字南村河南新安人乾隆六年知吉安清白嚴明
吏民畏服尤崇尙文教鷺洲書院自徐亨時清復田租
後九邑士雲集肅高益振興之每課必親臨講席勗諸
生以躬行心得之要尋以憂去

符乘龍字斯萬撫州宜黃人進士乾隆十三年以知縣改
吉安府學教授訓飭多士以制行爲先尤加意寒畯勸
勉振拔有急併力欣助知府王銘琮素重士見乘龍造

就有方課文延乘龍評甲乙在任十二年掌教鷺洲書院重修鷺洲志以年老告休去郡人士勒石講堂以上盧志

王銘琮上元人舉人知吉安政簡刑清作育人才選髫齡

高才生泰和姚頤永新龍亨繡吉水郭縉光入衙齋肄

業聘浙人吳青為之師後皆掇科第著聞於世銘琮解

組郡人立去思碑於鷺洲書院講堂文為金壇馮秉忠

所撰時秉忠蓋掌書院教事云

盧崧奉天鑲黃旗人副貢先任蓮花廳同知有善政乾隆

三十八年自江淮擢守吉安性勤敏刀圖振興修城池

葺廟學以鷺洲書院十屬肄業人眾增建逢原堂數楹

擴其號舍並益膏餼定課程多士皆為感奮府志歷久

未修重加纂輯

張敦仁字古餘山西陽城人進士乾隆五十八年令廬陵

以廉能擢去嘉慶初知吉安府愛民造士悉本實心十

六年龍泉匪徒滋事大吏欲調兵敦仁力持不可乃馳

往剴切曉諭誅渠魁而宥脅從全活者眾尋調任南昌

士民遮道攀轅思慕不置

劉體重字梅坪趙城人舉人道光六年任吉安知府丰裁

峻厲明斷有為每親歷各屬察訪民間利病除蠹役懲

貪吏積弊一清雅意重士舉鷺洲書院堂課必為授餐

諄諄以敦品相勉士習益端七年春書院雲章閣圯捐

俸倡修旋以調任去官至湖北布政使

李鎔經字子畚定襄人由部曹出守建昌道光二十二年調任吉安謙和誠篤潔已愛民訓士以理學為宗倡建青原書院課試經藝策論購書數千卷為士子考核資又詳請文天祥從祀兩廡刊布先正格言其振文教之功良多

陳源克字岱雲湖南茶陵人道光二十六年白翰林出守吉安居官儉約有儒素風愛民如子尤加意造士月課鷺洲書院拔其尤者入署面課惜任未一載以調去

劉拱宸字伯瑗瑞州新昌人由道光十七年拔貢授吉安府學訓導十九年舉於鄉二十四年成進士在任十年好汲引後進興教化植倫常知府李鎔經詳請文天祥

從祀創建青原書院倡勸經營皆拱宸力也後銓知縣去仕至南陽知府卒

王本梧字琴仙浙江人咸豐元年由御史知吉安政尙寬仁加意造士三年楚匪鄒恩濫煽亂泰和本梧率師赴勦失利會粵逆日熾人心搖動鄒恩濫遂糾黨徑撲郡城西南關大肆焚掠本梧親冒矢石乘勝追至鐵佛寺

前伏發遇害永新尹品文斂其屍照磨謝時霖亦從死陳宗元字柳平江蘇吳江人進士咸豐四年由吏部郎出守吉安勤政率屬造士尤殷月課白鷺青原兩書院捐

廉厚將並授餐招諸生入署親為訓迪五年冬粵寇撲城宗元激厲士卒晝夜防禦屢有斬獲賊麇集攻圍兩

月餘援絕力盡明年正月二十五日城陷死之子世濟亦與難同時守城者通判王保庸字湘舟榆林人罵賊支解死府經歷林蔚江蘇人教諭李傳心崇仁舉人有學行與教授余步蟾委員萬慶章俱以身殉闔城員弁無一免者陳宗元昭道員例賜卹餘各卹蔭有差並附祀周玉衡吉安專祠

曾省三字佑卿四川榮縣人由庶常改部曹出守南康同治初元調吉安性磊落能任事時值兵燹之餘百務俱廢省三力為振作衙署考棚以次修復且多方籌輸為鷺洲書院東脩膏火之費由是考課舉行如舊以丁母憂去以上新

統轄名宦

宋

張齊賢字師亮曹州人為江南西路轉運副使先是江南諸州小民居官地者有地房錢吉州緣江地雖淪沒猶納勾欄地錢編木而浮居者名水場錢皆前代弊政齊賢悉論免之採宋史補

元

王良字止善諸暨人為江西行省左右司員外郎安福有小吏誣民欺隱詭寄田租九千餘石初止入家前後株連至千家行省遣官按問吏已伏其虛誑而有司喜功生事復勒其民報合徵糧六百餘石憲司援詔條革去

終莫能止艮到官首言是州之糧比元經理已增一千一百餘石豈復有欺隱詭寄者乎準憲司所擬可也行省用良言悉蠲之

元史

明

陳憲字廷章定海人永樂進士授御史巡按江西吉安所千戶臧清橫甚都司庇之他官莫敢詰憲廉得清殺一家無罪三人執訊辭伏械至京正法時稱為名御史

南昌府志

林瑜字子潤龍巖人永樂中任江西按察司僉事安福有劇盜未獲奸民誣為富家所匿瑜廉得真盜富家得釋陞本司副使

周用字行之吳江人宏治進士正德中擢給事中嘉靖間為都御史以吉安撫州二府屬縣萬安龍泉泰和永豐永寧樂安接壤詞訟繁連異府人民難以勾攝建議增

轄以便統屬

以上通志

汪一中字正叔歙縣人江西副使以勦寇駐兵吉安賊入泰和境泰和巡檢劉茂力戰死成磔其尸一中率兵至與諸將吏祭劉茂曰爾職抱關猶死疆事吾待罪方面不滅賊何以生為遂誓師入陣俘五人斬首以徇旦日陣如前會賊至左右皆潰一中躍馬當賊鋒左脇及兩臂中鎗刃與指揮王應鵬千戶唐鼎皆死事聞贈光祿卿諡忠愍妻程氏不食五日死

參通志泰和縣志

龔道立字應身武進人萬歷進士官江西嶺北道參政道立以經術飾吏治在吉安葺白鷺洲書院與王時槐鄒

元標講學其中著有白鷺洲書院問答摘通志

黃承元字履常秀水人萬歷進士官湖西參政間歲遷廣

西湖西父老籲留之乃復治湖西以恤民隱寬民力為

首務其時璫璠以督窰至與陳璫比承元移書禁止土

青累千百言璫歛容遜謝事竟寢永新萬安諸材官寅

緣作奸糜屯糈為漕累或貸富人錢虛募營卒以應承

元悉釐革哀屯益漕自出官鏹為營規三載晉河南右

轄累官福建巡撫盧志

彭期生字觀我海鹽人萬歷四十四年進士崇禎十六年

由南京兵部郎中遷湖西兵備僉事駐吉安吉安不守

走贛州與楊廷麟萬元吉同守贛州城破冠帶自縊死

參明史通志 盧志案云朱彝尊詩話載期生與楊萬諸公力保孤城死之日守備楊大器潛收其尸瘞於萬安縣之百家村仲子孫貽訪其遺骸不得久之鄉人胡樞知萬安縣事一夕夢先生語曰遺骸在縣境君能歸之故鄉幸甚會大器之友曾堯昶亦以狀白樞樞資遣之歸葬海鹽說者比之思歸之温序焉

國朝

施閏章字尚白別字愚山江南宣城人順治六年進士由

山東學政按察司僉事遷江西布政司參議分守湖西

道行部吉安時軍餉嚴迫屬縣多逋賦追呼急輒相聚

為盜閏章作勸民急公歌垂涕諭諸父老遂相率輸租

恐後吉水有巨室依險自保縣令乘間執之以叛聞閏

章察其冤諭令輸租而遣之因遍歷崇山廣谷作詩諷告諸長吏有元結之遺音修景賢白鷺洲兩書院集多士講學其中或屏車騎往來金牛石蓮青原諸名勝宴遊賦詩遠近爭就聽講學倡復五賢祠道一堂吉安者舊逸民以為自鄒羅諸先正青原會後未有比盛以缺裁歸越十年薦舉博學鴻詞授翰林院侍讀卒於官廬志

周玉衡字潤山湖北沔陽人舉人先知贛州府嗣擢兵備吉南贛寧道皆有政聲咸豐五年陞江西按察使適粵寇由湖南入吉安境玉衡統軍追賊至袁瑞二州界退屯吉安寇來圍城登陴固守寇聚益眾以書告急大府援兵為道梗不得進被困兩月餘糧盡城陷死之事聞

照布政使例賜卹諡忠恪並建專祠於吉南贛三府子恩慶布政司理問自新縣丞俱被害各予卹典新增

蓮花廳名宦

國朝

黃增歷字義亭安徽歙縣人乾隆九年廳治甫設增歷首膺新篆規模具舉倥偬中尤以培植人才為急興學校

勤考課有循吏風據廳志增

李其昌字敬伯一字漣溪四川成都人進士乾隆二十三

年由新建令擢任蓮花廳廳境多崇山盜賊蜂聚其昌懸賞飭緝獲首盜數人真於法盜寢息鄉俗元宵連會迎神糜費多金貧者致鬻產男女合婚憑巫操縱其間

為利藪並禁絕之舊征收糧米無度為持平定章籌畫
省運建 上諭亭葺學宮修廳志尤殷殷課士卜基

創書院甫興工以陞貴州知府去

盧志

德起字紫庭正紅旗人乾隆二十七年任廳事興利除弊

著廉能聲倡置琴水書院田租以贍士廳人立德政碑

紀之

據廳志增

廬陵名宦

唐

張儂元和間為廬陵令廉惠通敏彈擊豪黠撫恤細民嘗
捐俸掩骼招復流離民有兄弟相訐者儂解諭卒相好
如初自儂莅任連歲大穰皇甫湜稱其恂恂奉上煦煦

宋

姜遵淄川人天禧間知廬陵清廉慈惠守正不阿時刺史

貧墨深忌之被劾罷職鞫之無狀詔復其官以清正聞

擢殿中侍御史

陳巽字公順景祐三年知廬陵民好事多訟案牘旁午巽

摘奸發伏如神逾年竟至無訟尋以廉能擢去

程珦河南人二程子父為廬陵尉遠近學者多宗之

陳汝器字適用元豐初令廬陵黃庭堅稱其資性剛方剖

斷無滯任法不避權勢牧民務去敗類簿籍謹細如書

生所鈔書以廬陵之難而稱治其賢可知

以上盧志

字民蓋紀實也

通志

黃疇若淳熙中由靈川令改知廬陵縣州常以六月督疇

零稅疇若念民方艱食取任內俸錢三千緡為民代輸

兩年治行稱著參宋史舊志案嘉泰元年楊誠齋有送廬陵宰黃伯庸赴召詩伯庸當是疇

若之字再查宋史淳熙凡十六年紹熙凡五年慶元凡六年乃至嘉泰附此備攷

冷應徵字公定隆興分宜人寶慶元年進士調廬陵主簿

卽以廉能著有想事臺府者必曰願下廬陵清主簿尤

為楊長孺所識拔採宋史補

龔升字子輝豫章人宰廬陵博學善屬文聽斷不稍枉每

折一獄命吏備書於冊多據經史語名曰帥正錄訟簡

政清吏民敬畏如神時丞相文天祥家居極善之為序

帥正錄廬志

元

秦思延祐四年尹廬陵材識明敏臨事善斷邑雖劇竟至

無事修學宮崇儒術士多尙行修

管文通至正三年尹廬陵下車首修文廟敬學興賢儒林

翕然宗之折獄片言輿情帖服案秦思管文通俱縣尹伯不花脫脫因納皆達

魯花赤廬志注云秦思表作伯不花管文通表作脫脫因納是誤四人為兩人今從縣志刪正

韓家奴至正八年為廬陵宣差不花公平廉靜性至孝自

奉淡泊俸祿所餘歸以養母後乞養解官去以上廬志

寶童字惟善蒙古人為廬陵達魯花赤盜陷郡城寶童集

義士力戰殺賊甚眾廬陵復安通志廬志案云廬陵志載至正十一年宜春

吉水安福等縣羣盜作亂城陷寶童集士力戰賊敗枕尸數十里後賊陷袁州城又有戰功陞廣東僉都元帥

歿於陣

明

王泰河南衛輝人洪武七年令廬陵開國之初前令未遑興學泰至增修學宮鼓舞儒士令行政舉民安職業邑稱大治

李景南洪武間爲廬陵主簿與知縣王泰同心共濟篤於學校勤於佐理

劉灝山東武陽人洪武十三年知廬陵縣精明果敢案無留牒民交口稱譽治縣二年去

陸謙揚州江都人洪武十五年知廬陵平恕廉謹訓士拊民誠懇備至滿任去邑人遮道泣送

孔文英陝西慶陽人洪武二十八年由進士知廬陵廉介剛毅官署所需一絲一粟不以累人察胥吏蠹民者盡法治之事有不便於民去之必力擢監察御史去

朱幹鳳陽人洪武三十一年知廬陵性敏達燭奸如神操守廉介一清如水人不敢干以私羣稱賢令尹

張源字本深江陵人永樂五年知廬陵治民先鋤強暴曰強暴不去何由綏良善也學校橋梁驛鋪以次修飾署泰和縣秦人爲之立傳

費鎧寧波人成化間知廬陵明敏沈重剔除蠹弊不稍留餘平居喜怒未嘗或形於色胥吏莫窺其際治邑二載役畏民懷

段敏鎮江人宏治間知廬陵為政寬平不尚苛刻嘗曰嚴以御左右寬以盡下情吾願左右畏不願吾民畏也催科不擾民輸賦恐後社館遴俊秀子弟授以小學教先禮讓常親至館講論士民依之如慈母

柳尙義巴陵人宏治間令廬陵才敏善理繁劇民强悍者畏其法良善者懷其惠征輸置一方冊勸民屆期自輸不令民為役擾其郊行詩云斯民直道還三代長吏循良愧後生後擢御史去以上廬志

王守仁字伯安餘姚人進士宏治間任兵部主事以言戴銑等事語侵大監劉瑾下守仁獄予杖謫貴州龍場驛丞正德五年瑾伏誅乃擢知廬陵縣守仁治尙德化訪

鄉耆之賢者坐旌善申明二亭講論旌善亭勸善申明亭懲惡之旨令訟者聽鄉耆勸解不聽自治之人多感化倡良知之學郡人宗之安福鄒守益嘗從講學於青原山後有四大弟子之稱皆郡屬人旋入覲遷南京刑部主事十一年命巡撫南贛漳汀率知府伍文定萬安知縣王冕等平宸濠封新建伯參明史傅頤沔陽州人嘉靖十一年進士知廬陵時年甫冠處冗劇迎刃而解人不能欺每從儔眾中識一人久之能記憶恬靜持重知大體後官至戶部尙書

袁袞吳縣人嘉靖間令廬陵通敏廉潔首勸農桑懲惰民抑勢豪洗冤蠲逋鄉無捕吏積書點算相戒不敢逞志

邑故多虛糧白大吏清丈勞心焦思者三年貧民悉蒙其利

宋登定與人嘉靖間爲廬陵令教眾植桑以收蠶利修鄉約建社倉民有冤抑迫切如身事必昭雪之乃已性最孝親歿悲號聞者泣下

梁以蘅字仲芳廣東新會人嘉靖間爲廬陵學教諭以實踐教人恥索新進諸生贊至卽令見言學恒稱述陳獻章每以口談道學不躬行實踐爲深戒旣去諸生爲立去思碑

錢一本字國瑞武進人萬歷進士知廬陵崇尚正學與安福王時槐講道深相契洽興修學宮振作儒林多士宗之徵授御史入臺請崇祀曹端陳真晟羅倫羅洪先於文廟奏原任江西巡撫祝某貪墨狀懇直敢言朝臣忌之卒罷去

莊祖誥四川人萬歷進士由永新知縣調廬陵廉介不苟頌聲載道一日有布衣老人一童子執荆隨之傳柝而入祖誥迎拜甚恭老人乃祖誥舅也曰吾商粵過此若翁授我荆屬我廉汝政事有不善命以此荆杖汝今予過境第聞汝令名予可歸報若翁矣言畢卽偕童子去留之不得祖誥乃步行送之舟次

明時舉四川人萬歷進士由峽江知縣調廬陵治績以慈仁著四十二年大饑時舉設法賑賚後水旱頻仍請改

折南屯米縣賴以甦數擒大盜鄉村貼然以上廬志

陸康稷字宇粒蘇州人萬歷進士知廬陵立法與民休息

鋤奸翦莠迅不掩耳養濟院丐者素橫聞鄉里喜慶事

輒糾眾擁門需索有富家氣憤毆之丐舁一屍至縣指

為富家毆斃康稷驗屍口中有土詰以掘死人誣告丐

吐實服罪一縣奇之內擢將行值編審悉定而後去通志

張昂之華亭人天啟進士令廬陵耿介不阿上時鄉紳某

與直指有舊爭訟理屈昂按以法無少徇兵備使者諷

曰作令須五味具足昂答曰職一味苦而已會禁偽學

排鄒元標令撤白鷺書院昂姑應之書院卒保如故

關捷先廣東南海人進士崇禎間知廬陵持己清廉治尙

德化會游兵過境突逼城下捷先戒民勿擾曰若輩所

欲者利耳乃登城厲聲曰予廬陵令也貧邑無多財以

千金犒願速去若必不已背城一戰遂引去尋以憂解

任囊橐蕭然士民共集數千金致贖捷先堅不受眾以

所集金建祠南街顏其堂曰海上清風以上廬志

學名宦祠現奉牌位而通志舊府縣志皆無傳可稽者

自宋以下共二十人宋孟似雷王昌羅烈黃萇劉汝礪

麟翁溥蕭奇勳胡廷宴劉成廣姜芳陳善今附存其名

國朝張文熹浙江人貢生順治間知廬陵有富人因壻貧欲易

婚壻訟於縣文熹察其實令富者出資二十金當判壻

別娶翼日集富人女與壻面質卽以其二十金為奩資

具鼓樂肩輿令其婿迎女而歸

劉愈炤揚州如臯人順治間令廬陵待士以禮恤民以誠目擊邑民凋敝拊膺曰吾安忍催科耶好語諭民自輸皆頌劉公長者竟以積欠註誤解任

于藻順天大興人貢士康熙元年知廬陵修廢舉墜利興害除三年知府郭景昌新莅任勵精圖治藻益克盡其才請復淮鹽清軍戶重修便民倉於城西兩建兌漕倉於省會立義學於景賢書院自捐膏火復置產取租以資修葺在任十餘年為廬陵治績之最

成績字東乳陝西耀州人康熙三年任井岡司巡檢好學能文恥言貨利勸民務本業戒游惰守道施閭章講學

白鷺青原間績往隨之閩章欣然與語知府郭景昌知縣于藻並引重後卒於武陵井岡民恒思之以上廬志

陳復新字煥然潞城人康熙十四年任廬陵典史時滇逆方肆甫莅任賊兵遽至遂被執偽將韓大任委以官不受羈民舍以兵守之復新乘間令僕亡去自經死祀廬

陵名宦 山西通志

陸在新字蔚文長洲人舉人康熙二十五年由松江教授陞廬陵知縣有威稜境內貼然縣治前建問苦亭諮民疾苦催科有法尤愛禮士自奉若寒素卒於官民罷市三日白衣冠送者填道通志

劉廷瑛字定巖直隸廣平人進士康熙三十九年知廬陵

自奉淡泊課士必語以孝弟遜讓凡輸納錢漕聽民投櫃平斛嚴馭書役折獄如神城南曲溪高岸當贛水之衝外高中下四十三年圮於水居民田廬浸沒廷瑛捐廉倡築臨川李紱記之名劉公堤去之日士民爭致贐堅不受又嘗署篆安福多善政兩縣並祀之

曾璧澧寧都人歲貢康熙間任廬陵訓導時諸生專務文藝璧澧至課以經史終日與諸生講論知縣劉廷瑛賢而禮士與璧澧相契洽然非公卒不一顧脩然立於物表學校中言樂育之盛輒思劉曾

塗宗震直隸宣化人貢生康熙五十一年爲廬陵令延福鄉民素強橫積欠錢糧官法莫制宗震親往諭以利害拘其首數人予杖語之曰爾輩一入城卽無性命歸矣姑釋爾勉爲良民留三日積欠一清自是鄉民感化在任十六年培植儒林撫恤百姓案無留牘野無追呼一時咸稱循吏

王恩進湖北東湖人拔貢生雍正十三年知廬陵臨民接士如家人父子情無不達其母賢而知大義恩進事無無鉅細退必告母母色霽則喜稍不悅長跽受教折獄罕用刑一日鞭扑十數人退見母有慚色母曰日所懲者何犯恩進以吏役舞法告母大喜勞以酒曰兒性慈能嚴懲蠹役則民鮮冤抑矣治邑七年去

汪執桓字銳升一字碧峯甘肅隴西人進士乾隆十三年

由興國知縣調廬陵涖任僅數月役有窩盜匿娼舞文
 弄法者訟師把持游惰聚賭者皆廉得其實嚴懲之縣
 稱大治尤加意造士重建景賢書院復廬陵縣義學清
 復故址未及興工內擢中書去以上廬志
 元克中字立庭直隸靜海人乾隆間由舉人知廬陵縣政
 尚寬恕凡聽訟任兩造辨論徐以片言折之雖盛怒不
 遽加鞭捶廉明聲著以卓薦去

范元颺沙縣人進士乾隆間知廬陵縣事勤恤民隱治獄
 不以刑求歲值旱步禱青原天華諸山雨隨沛崇獎士
 林每鄉征與生童課文講論諄諄如家人城內四隅捐
 廉設義學延師教育童蒙至今頌之

郎昫字曉屏山東濰縣人道光十三年任廬陵性懇摯有
 慈父母稱捐廉課士悉心訓獎十四年縣大水所在廬
 舍漂蕩民多露處昫親赴鄉村葛衣行烈日中溫語拊
 循百端勸賑全活甚眾

顧麟趾字恕齋陝西臨潼人由吏員知廬陵縣事性耿介
 不阿鋤豪強嚴懲奸胥黠吏每赴鄉勘驗輕騎減從不
 以擾民在任數載所識拔多知名士寓撫字於催科村
 氓野老至今猶以好官稱之

楊驍昫字春野山西和順人進士初任永寧縣以廉明稱
 道光三十年因漕滋事大府知曉昫賢調任廬陵至則
 平其價揭榜撫綏政除煩苛居官如儒素咸豐六年正

月粵匪陷城曉昫率家屬自焚死事聞照和府例賜卹子郁齋賓齋同殉皆予卹典

姚體備字秋浦山東鉅野人進士咸豐七年任廬陵時粵寇踞城官兵紮固江體備竭力勸輸軍餉恒達旦不寐又整飭團練協防助勦城復招集流亡築城垣修壇廟並捐廉資石陽書院膏火舉行考課凡有裨士民者屢勉行之惜不久任擢皖南道去以上採縣志新增

泰和名宦

南唐

張翊其先京兆人至吉州之太和見槎富沃壤居焉翊射策中第授虔州判官改太和令在任政績顯著尤長文

翰禾山大舜二妃廟及廬陵紫陽觀新興佛閣碑記皆

翊所撰參廬志案廬志判官作推官廬陵作邑中今從十國春秋更正廬志作西昌令十國春秋同

西昌舊縣隋時已併入太和作西昌者假借也今易之又案廬志此傳全本泰和志所稱先人見槎富沃壤居焉與十國春秋稱翊父遷禾川僦屋居焉互異且翊有弟惟彬亦見十國春秋江西通志選舉載翊惟彬俱作永新人居太和槎富之說果何據乎特附著以存疑

宋

戚綸字仲言應天楚邱人太平興國八年進士知太和民險悍多構訟為諭民詩五十篇因時俗耳目之事以申規誨老幼多傳誦之每歲時必與囚約遣歸祀其先皆如期而還遷光祿寺丞宋史

范應辰咸平間以大理評事為太和令振興學校遷建文

宣廟於縣之良方作廟學記 盧志

呂士元字佐堯江寧人咸平間為太和令縣舊多猾吏往往因事中令以法多不免士元日升堂判曲直辨情偽猾吏伺之終無毫髮過失可得祿食所入悉周其族子添隨侍縣署創讀書臺後廷試第一

王陶韶州曲江人唐宰相珪之後珪子敬直坐事貶嶺南子孫留者寓曲江父式由進士知永新陶博學有俊才登天聖五年進士慶歷元年知太和與革利患不局局於簿書不搖惑於毀譽縣署傾圮費錢百萬修之自為

記 盧志案云舊志載王陶字樂道太原人通志攷王陶修署碑有老親居曲江之語則知泰縣王陶是粵人與宋史所載王陶各別

盛陶字仲叔鄭州人熙寧中宰太和臨政不撓忌者中以

飛語縣人曾綱 通志誤 作剛 率士詣府力辨之未幾陶以才

德擢御史 以上通志

黃庭堅字魯直分寧人元豐初知太和會頌鹽筴諸縣爭受多數迎合大吏意庭堅積鹽於廩不忍以賦貧民大吏不悅民實受其賜詢求民瘼雖山溪窮僻縣令所未嘗至必身親之夜紀民間疾苦利弊於冊思所以保惠之或達旦不寐性喜山水之勝所至多留題 參宋史

胡遵道新喻人元豐初任太和主簿性至孝嘗以安車奉父就養與庭堅為同僚友

蕭伯原新淦人為太和縣丞時金兵壓境官屬解散伯原

獨率眾守死不去州守嘉其忠命署縣事

劉楠字公材清江人紹興初知太和首興學校樂育人才

縣人愛戴之為立生祠於縣學以上盧志

陳則字準夫紹興間為太和令奉身廉潔嚴而不苛時朝

廷置免行錢郡賦之縣諸縣俯首聽命則獨廷爭之故

太和占數獨輕公暇課隸役種桑麻公圃中有勸民五

事一盜賊二侈靡三詭戶飛產四不耕不蠶五善惡之

報通志

方師尹字民瞻弋陽人紹興中為太和令居官愷悌不邀

名譽會章貢兵變欲順流直下皆急遽無措師尹靜以

桴之編木為柵似鹿角狀橫截江流賊聞有備遂寢居

六年罷任尋拜左司郎中後遷江西提點刑獄以老致

仕盧志

蒲堯仁字彥性福唐人乾道六年知太和廉白端謹自奉

尤薄嘗曰吾不以口腹累人聞輟俸餘散諸貧民不為

儲積計縣解火縣人環視嘆息相與出力新之不費縣

官一錢居官三年未嘗以色假人亦不以言拒人民訟

庭下詣復曉以禮義甚不得已乃加誚責性寬厚人皆

樂之去之日民爭齎送錢帛一無所受學士胡銓薦之

曰所居民化所守不遷蓋紀實云豫章書

陳秀實嘗侍其父為太和縣簿淳熙初來知太和縣民情

土俗本所深諳凡所因革切中人心與縣丞張可速同

修縣志西昌文獻賴以不墜

趙蕃字昌父為太和縣簿以清廉著楊萬里贈蕃詩有俸錢三月不曾支竹陰過午未長炊之句

趙師真字周佐紹熙初知太和闢黌舍益庖廩振興學校每催科俾民自為期無追呼之擾兩造之辭據案立決

不以委吏

以上盧志

卓洵字士直長樂人慶元間知太和留心水利創置沿溪

六閘灌田萬畝民至今食其澤

通志案士直楊誠齋詩集作士真

趙汝暮字嘉言南昌人嘉泰中知太和縣濱江無官渡悍民撐小舟貪利重載致多溺斃汝暮多造船分濟又出榜立禁約為經久計其興利除害愛撫小民政績多類

此 盧志

元

曾翰永豐人至治中授太和州同知有巨室富僧訴訟不

決使人致賄於翰許鈔一千錠翰痛拒之卒繩以法

海鵬飛至正初監太和州事振興學校倡捐學租於是義

士李以中捐租六百石入學供膳師生

以上盧志

達理馬識禮字正道高昌人至正間監太和州廉明剛毅

民望而畏之鋤強激義禦寇有備每夜親率士卒巡城

巡江中夜始還復篝燈讀書不倦寇陷吉安各望風瓦

解大和獨賴以安逾年卒於官州人繪像以祀

何抄爾赤邲縣人至正間以達魯花赤監太和州時西鄙

民不靖官兵至欲夷及無辜抄爾赤白都統曰城內外皆良民其不順者西鄙也官兵乃西去一邑得免民廟

祀之以上通志 案原文作至元間攷職官表作至正十三年任傳文有誤今改正

趙友直至正間為太和州判監州達理馬識禮禦寇集州

忠義士十人引兵往石壁友直身當最險衝鋒斫賊所

至風靡後賊還擊友直戰死盧志

明

吳去疾安慶人明太祖吳元年平陳氏去疾以儒士知太

和州時城始歸附人民逃散乃多方招徠飢者食之病

者藥之是年秋稅皆告糴他郡以輸州舊城圯去疾下

令新之不一月而就文廟修理延師迪士以擢去盧志

顧文昱字光遠蘇州嘉定人吳四年知太和州前知州吳

去疾以民好訟告文昱文昱乃自為書榜聯紙長數丈

誨諭諳切民爭來觀觀已不願訟者什二又俾凡訟者

居譙門上思三日然後得訴未及三日不願訟者過半

乃擇吏醜謹者一人置簿受詞民誠負冤輒為疏理非

誠負冤願悔自止者聽不問未兩月民不復訟境有虎

文昱為檄告神虎一夕去州大治官至廣東行省郎中

文昱嘗從楊仲宏學詩自號蔗境翁有詩數卷題曰蔗

翁吟橐參通志

沈夔安慶人洪武初知泰和治無苛刻民受其惠時解字

圯廢夔善為修葺加於舊規盧志

劉昭先字宗啟洪武初以人材舉三年以御史知泰和政
 尚清簡未嘗疾言遽色事至隨應上不負公下不勞民
 新城隍祠及山川風雲雷雨社稷等壇又修稅課局惠
 民藥局嘗聘縣人楊自立羅子理鄧崇志為義學弟子
 師多所成就歷官禮部尚書祀名宦參豫章書通志
 陳能會稽人洪武三年為泰和縣丞佐政廉潔奉公恪勤
 終日端坐公署泊然寡營迎父就養極盡孝敬為邑人
 所取法

郝思讓字好謙平陽人洪武間知泰和勤政治平徭役興
 學校果敢有為士民咸懷其惠

徐遜字伯敏江陰人洪武間為泰和令明敏有才尊賢任
 能禁奸革弊吏不敢欺

應承完字子固奉化人洪武間宰泰和毀淫祠革吏弊除
 一民蠹境內民患疫承完親禱引罪疫患遂平

孫公與鄞縣人洪武末知泰和居官嚴肅處事明決南鄉
 東泐小寇竊發躬親撫定考滿去職

吳勝祖温州人洪武末任泰和主簿居官廉潔佐治有聲
 卒於官貧無以為殮民皆賻歸其喪

李吉字惠迪青州人以御史知泰和莅政勤敏不稍苛刻
 咸稱長者任滿陞長沙同知

郭璘字煥文永嘉人由御史知泰和寬厚廉介在任不見
 其功去後德之

徐麟淮海人永樂間任泰和典史會大旱頻禱不雨禾盡槁麟行烈日中禱於快閣刺臂血澆酒頃刻雨降

吳莖字景春宜興人洪熙間令泰和慈恕善惠下以狷介不合上官意而去以上盧志

曹龜字萬鍾寧晉人宣德初為泰和典史愛民如子力學不懈因督工匠至京陳情人試遂中順天鄉舉明年登進士第一通志

單信字忠孚奉化人宣德初任泰和教諭性坦白講學重躬修輕利祿教人各因其材質使徐歸於正學者皆宗之致仕去多士留居泰和年九十而終孫昂登景泰五年進士盧志

余耀字叔炫莆田人永樂進士正統初以薦起判吉安掌泰和縣事民愛之如父母三載考績王直署之曰廉潔勤慎慈惠久而不變楊士奇贈以詩云澄江一道分明月照見余侯一片心誰謂今人不如古古來循吏即如今後以憂去參豫章書舊志

劉芳字永馨四川蒼溪人進士正統間知泰和慈恕寬厚士民愛戴秩滿擢去百姓籲留治縣九年風俗醇美陞臨安知府盧志

孫暉字景暉海寧人景泰三年以賢良方正薦授泰和縣丞親定徭役請託不行每一牒下眾指為鐵板榜言其公允不可更易也擢博白知縣累官山東參政通志盧志案

云泰和志載璋以儒飾吏有才守民甚宜之時顏夔為縣嚴毅簡亢然獨加敬禮後顏以事去士民赴京留璋補令不報

譚昇字公照雲南人進士成化初為泰和令廉介平易民親愛之在任三年與民休息陞合州知州

王輔大興籍鄉舉成化間令泰和悉心民瘼革除舊弊民甚稱便未幾以憂去

陳穀字推士山陰人進士成化間知泰和廉平明敏急事寧人在任六年以清正聞擢監察御史

吳必顯字德純石埭人進士宏治初令泰和建譙樓修葺廨署凡興廢舉墜措置有方每旱禱雨輒應縣人賦詩頌美侍讀尹直為之序陞澤州知州

鍾雲字公默丹陽人宏治初為泰和主簿居官清澹不計利亦絕不言貧性好蓮嘗構愛蓮亭縣人尹直作廉簿歌以美之

沈時字元中崑山人進士宏治間由餘干知縣調泰和興修學宮及社稷各壇建復達侯祠禮士愛民釐奸剔弊豪惡斂跡士民乂安

楊南金鄧州人宏治中知泰和撫黃山谷祠宇清復祭田以崇正祀縣人羅欽順稱之曰政尚簡易民不忍欺其

操行可法以上盧志

陸震字汝亨蘭溪人正德進士知泰和縣時劉瑾擅政以通鹽課誣民縣中當償者萬計震力白上官得免中官

歲徵貢精葛震減其額增築學舍以居諸生建倉縣左
儲穀備賑親行鄉落勸課農桑立保伍法使民防盜土
城易築以磚其後辛酉寇至得無患督捕永豐新淦賊
以功徵為兵部主事泰和人生祀之 通志

李楫安慶人進士正德十四年知泰和值宸濠之變巡撫
南贛王守仁會師樟樹鎮楫亦率兵來會破南昌擒宸
濠楫與有功 盧志

周詔四川富順人進士正德間知泰和縣時有巨寇廖贊
戴鳳池連結南贛諸賊四出劫掠詔先後捕渠魁殲之
餘置不問秩滿陞刑部主事士民立祠縣治之右與陸
震並祀

王春復晉江人嘉靖進士知泰和剔弊糧造實徵總冊按
戶給之利及數世縣舊有淘金浩溪二驛去縣治各五
十里供億繁民甚苦之乃請併為白下驛費大省至今

人思王侯 以上通志

馮叔吉慈谿人進士嘉靖中知泰和慈和廉敏屢著善政
時寇賊方熾叔吉堅修城垣寇至保守無患 盧志

劉茂濟南人嘉靖間為泰和巡檢隣境寇逼泰和茂力戰
死副使汪一特為文祭之 通志 盧志案云泰和志載

進勦戰於馬纓岡失援陷陣罵賊不屈
剖腹裂肢而死劉茂通志作劉芳疑誤

孔永祐湖廣光化人隆慶中為泰和教諭性朴誠言笑不
苟諸生有過必反復諭之見其悛改喜形於色遇貧士

謁見堅不受贄人感其誠

吳大進金華人萬歷初為泰和縣丞操守廉潔居官三載不妄受一錢

唐伯元字曙台澄海人進士萬歷初知泰和增新廨署編纂縣志修城濬濠設立社倉清理溝渠民甚德之以上盧志

濮中玉字琢峰舒城人萬歷進士知泰和為政威惠並用守正不阿積俸為民償逋賦倡立社學置田以贍貧不能得師者皆來就學去官之日蕭然敝篋

王元瑞字心岫華亭人萬歷進士知泰和愷悌樂易不事苛刻平糶救饑捐俸築堤水不為患至今稱為王公堤以上通志

吳文瀛松江人萬歷進士知泰和六年恩威並濟歲荒煮粥賑饑築壇祈雨有禱必應任滿考績行取御史民立

石建祠盧志

國朝

顓孫佐聖徐州人貢生康熙初任泰和縣審丁清丈開豁虛糧造赤歷以杜虛懸逋欠諸弊奉發福建降兵安插屯田力請中止通志

宋德馥恩縣人舉人康熙間知泰和清廉方正撫字催科不愧循良學校人才尤加意整飭

田惟冀字禹先永平人康熙中莅泰和任強毅精明重建縣署葺學宮并修縣志以上盧志

冉棠字召思高陽人乾隆十六年知泰和縣在任凡五年
試士首拔姚頤續修志書甚洽輿論他政亦多可紀

鄭儉字文山四川人進士乾隆中任泰和敬賢禮士以寬
惠得民嘗修文廟明倫堂譙樓在任十七年去之日兩
袖清風士民思慕

沈衍慶字槐卿安徽石埭人進士道光二十三年任泰和
抑強鋤暴精明敢為吏胥為之歛戢嘗清糧米陋規資
萃和書院膏餼又倡建澄江書院以調繁去至今民猶

思慕不置以上採縣志新增

吉水名宦

劉宋

張約之堂邑人為吉陽令徐羨之既廢廬陵王劉義真約
之改為梁州府參軍尋殺之文帝即位詔曰故吉陽令
張約之抗疏矢言至誠慷慨事屈羣醜殞命遐疆志節
不伸宜加旌顯可贈以一郡賜錢十萬布百疋參宋史豫章書

案盧志誤作陳時人今更正

宋

蕭映字仲景新喻人天聖中進士為吉水令釐奸剔弊摘
發奇中德威並行縣以大治

程師孟字公闢吳人起家甲科景祐中為吉水令誠篤愛
民去久民益懷之

歐陽賓字國華新喻人令吉水訟者盈庭從容判決聲色

不厲民無冤抑以上盧志

周郊錢塘人嘉祐六年擢第為吉水令訟獄者皆朝裹糧而暮飯於家案無留贖通志

葛源字宗聖麗水人以太和三簿攝吉水令吉水素多猾吏每一令始至吏輒誘民入訴日數百牒欲令厭事而權歸已源至立訟者兩廡下使自書所訴多不能如狀僉曰吏某教我也立捕吏盡法治之訟由是寢息有毛氏寡婦告其子源以恩義說之毛氏不從源密使人探與毛氏語者捕得之乃謀誣其子者也窮治具服縣民輸租苦於輓運源始議置縣倉至今賴之參通志

梅琬崇寧間為吉水令清白自許不事干謁提舉齊之禮

行縣琬不郊迎提舉入省覽文書思所以難之琬於倉

齎出納訟牒留遺應答無毫髮謬提舉嘆賞薦諸朝

蕭雅字汝正曲江人建炎初知吉水時兵燹饑饉民不聊

生雅貸錢給粟掩骼埋胔劫盜張仲添將入城雅單騎

往諭之盜初執雅詢知雅名不忍加害雅曉以禍福盜

竟解去雅為治尚寬仁親民如子去之日民越境送者

千餘人以上盧志

徐若訥字不愚婺州人進士紹興初令吉水愷悌慈祥聽

斷明決民有訟其兄析產不均者兄力辯若訥曰盍即

舉弟所得者與兄易之兄弟皆俛首悅服通志

楊獬字正伯新喻人進士授吉水令歲饑亟發粟賑之全

活無算

趙錫衡州人紹興間為吉水令簡易慈祥民稱為趙佛子時訛傳贛寇至已入廬陵民大譁欲先逃避錫晏然攜酒山亭歡飲民心以安倉統帥征兵將過縣吏請貸諸富民以應軍需錫曰重擾吾民是自為寇也不許比統帥至即其軍帳指畫方畧統帥喜移兵去縣城曰毋駐此更擾汝民也錫母死郡守及縣人遺之金不受歸道茶陵遇掠寇有識錫者驚曰此趙佛子也還所掠送之出境

以上盧志

王正開封人紹興間為吉水令儉約自持公牒盈几一閱即得其情有餉以黃柑者止受一顆人服其廉介

陳臧孫字元甫天台人淳熙間為吉水令時征收民租胥吏究法臧孫經度踰年釐剔諸弊五鄉之民感其惠愛爭先輸賦尋請豁除虛租民甚德之

以上通志

李恕已慶元間任吉水主簿先時本縣儒學東向歲久傾塌恕已竭力倡新之改作南向人才由是輩出

林半千福州人嘉定間為吉水令下車即倡建儒學明年復建魁星樓尊崇至聖振興人文治為諸縣之冠所著有劬書行於世

熊彥明令吉水隣賊犯境彥明率五鄉民兵與戰遇害民

為立祠祀之

盧志案云彥明又見永豐志其蹟較詳或就近署篆兩縣俱祀應並存之

吳必大興國人為吉水縣丞操守器識為儒林所重早年

師事張栻呂祖謙晚師朱子會權臣詆朱子為偽學遂

棄官去以上盧志

元

張楫以忠翊校尉為吉水縣尹時民初歸附眾心洶洶楫

鎮壓軍馬勦除盜賊民安堵如故通志

明

馬德明明吳二年乙巳受太祖命為吉水州判州經兵火

殘燬德明下車宣布德意勞來招集洪武二年改州為

縣德明改官為主簿

費震鄱陽人洪武元年為吉水知州二年改州為縣仍任

知縣時天下初定震招撫流移營建官廨新學校均賦

役士民德之

李恒甫山西人洪武六年知吉水縣公正和平清廉謙下

治聲與費震齊名以上盧志

錢本中字文德武進人洪武末知吉水縣性端謹廉以律

已嚴以御吏寬以愛民既去民咸若失慈母永樂中以

胡廣薦復令吉水黃童白叟懽迎數十里卒於官里巷

哀思哭聲不絕百姓留葬縣境爭負土成墳參豫章書府舊志

王文富華亭人洪武末任吉水主簿悉心佐治小民樂業

豪強畏法時知縣錢本中縣丞林思義並以清廉慈惠

著邑稱大治盧志

柯暹字用晦池州人官給事中洪熙元年知永新訟牒盈

庭暹折以一二語唯唯警服暇召諸生講究經史廢修

墜舉民不知勞宣德初改知吉水修葺縣治加意學校

除奸剔弊吏畏民懷兩縣並祀之參通志 案暹附 見明史鄒緝傳

蔣紱字洪章蘇州人進士成化間知吉水新學宮興文教

深恤民間疾苦士民咸頌其德盧志

李智字若愚雲南昆明人成化間知縣事誠心愛民尤加

惠貧困恩江水驟漲衝決民居男婦漂流智下令拯一

人者予一金全活無算仍給薪米遣歸後以禱雨烈日

中得暴疾卒士民哀之貧不能返柩葬縣之牢縣志 橋 作驪

其子元方季方遂家焉通志

高陞台州太平人歲貢成化間任吉水訓導學行俱優教

人崇尚實學勿專務科名士習丕變

王俸字應爵吳縣人進士宏治初由上高令調知吉水才

識明敏秉公持正吏相戒勿犯民咸懷其德擢御史去

縣人思之不置

周廣字充之太倉崑山人宏治進士正德初知吉水縣廉

毅自持治行稱最凡所設施以愛民重士為先務纂修

縣志未卒業而擢去後廣為江西僉事志乃成

王激永嘉人進士嘉靖間知吉水以實心行實政聽訟平

允徵輸有法寇警屢至備禦有方民皆安堵廨宇出已

俸次第修葺尤加意庠序凡所賞鑑後皆為名士以上 盧志

許貫之字道卿錢塘人嘉靖進士知吉水守正人不敢干以私立法吏無所施其伎培植士風拊恤民瘼治行爲江右冠以兵科給士徵入諫垣七日而歿行篋惟故衣同年親故代殮之

通志

文嘉字休承長洲人先世本出吉州父徵明有盛名嘉靖中嘉爲吉水訓道教士先行後文縣人鄒元標爲童子時嘉奇其氣概留與子元善同學嘉天性過人事伯兄甚謹學者多感化

蘇士潤晉江人嘉靖末進士知吉水誠心行政訟獄持平催科不擾課士以理學爲宗主建羅洪先祠於學宮右併求其遺稿梓之

陳與相字虛舟海寧人進士萬歷七年知吉水爲政首先學校加惠儒林創仁文書院延山長講學旱荒禱雨諸生隨侍貧乏者袖中出倉穀印紙濟之

徐學聚字敬與一字石樓浙江蘭溪人萬歷進士由浮梁令調吉水自成化間屯軍編爲軍戶曰旗丁日久板累平民學聚按都督甲戶鱗次稽核鑄其存絕偶隻樹豐碑於縣門自是軍戶吏書無從舞弊縣多水患學聚爲築堤備禦人稱徐公堤連歲饑煮粥食貧民復手檄勸富人以濟又捐俸新仁文書院宗尙鄒元標興起絕學在官六年擢禮科給事中祀名宦

黃流芳字愷衷廣東歸善人萬歷進士知吉水在官六年

里甲弗便事盡為革除輸納持平修築河堤振興書院
創立社學士民並深愛戴擢部曹尋出為湖西兵備道
吉水為屬縣被澤益深

沈裕字慎菴餘姚人萬歷進士知吉水重辦學宮旌善良

懲豪強士習民風煥然不變入覲去縣人為詩歌贈其

行會同亨題其卷曰朝天清節

陳玉輝字荆璧溫陵人萬歷進士授吉水知縣勤於治理

洞悉情弊胥吏不敢欺盜皆遠遁縣中善惡臧否無不

周知人以為神異有文江政紀詳其行實擢御史去

孫之益字六吉四川邛州人萬歷進士任吉水縣建倉於

江西省城修株山橋詳請豁免縣中虛丁頌者以為百

世澤

溫臯謨字青霞廣東東莞人萬歷進士令吉水時穀價騰

貴斗米千錢臯謨賑貸有方民以不饑縣治濱江大水

暴至臯謨出城疾呼舟人懸賞援溺水平拊恤備至後

擢御史去縣人繪其貌於梵宮

何應奎字香菴桐城人萬歷進士授吉水知縣為政簡靜

愛民養士燭奸剔弊興利除害罔不周詳尤長於藻鑑

凡所賞識後皆為名士

萬煒字闇卿南昌人貢士萬歷間以浮梁訓導遷吉水教

諭訓士以躬行實踐為本貧者不受其贄併資助之為

鄒元標所敬禮

徐之垣字維翰鄞縣人天啟進士知吉水御隸胥嚴重縣之宿弊悉除造士愛民有實政

戴應舉字義所信豐人歲貢崇禎初任吉水訓導諸生中有貧士為鄉貴人所惡欲中以劣而屬之推官推官方攝郡篆檄報劣應舉詣郡極言某士非劣推官怒曰癡教官也應舉即日告去縣人為癡教官傳以美之

王龍震字起一晉江人崇禎進士授吉水知縣時催科方亟龍震力維持之獨吉水民得專一農事流寇犯永豐人心惶懼龍震撫綏有方寇卒不至永豐民避寇來者皆賴保全在任九年擢御史以上盧志

國朝

王雅字思繩浙江慈谿人進士康熙初授吉水知縣縣素患重賦自明季相沿如舊雅至惻然憫之力請於上官往返駁詰卒得報免旋值荒旱復上之大吏巡撫董衛國親詣勘并核賦重得實蠲免賑濟並舉皆雅力居多漕運例以冬月雅請改為京口米以春漲往民大便之在任三年修縣志禮儒士興利除害曉夜如不及擢吏部主事士民感戴立祠祀之

朱行義奉天鑲白旗人康熙中授吉水知縣時值滇寇擾攘之後行義竭力撫綏民有遺賦多捐俸代償在任十年以慈祥著所在名勝猶有遺翰人珍重之

張開業奉天鑲白旗人康熙中為吉水縣丞莅任十餘年

清貧自守專一愛民每因公赴鄉輕騎減從父老聞丞至皆懼迎道左縣令以訟委決無不平允擢昭平知縣馮震字青雷大興人康熙間授吉水知縣優禮儒士捐俸建義學延師教育慈惠牧民惟恐或傷擢知陝西涇州縣人於義學東建馮公書院祀之

鄧嗣禹字宿白萍鄉人歲貢爲吉水訓導潛心易學與諸生講究易理皆發秘要購求遺書得陳氏易爲世所罕覩手加論定付梓卒於官萍鄉人舉其善行從祀鄉賢所註有周易口義子霽彙編爲周易會歸

宋纘殷山東蒙陰人康熙間爲吉水典史悉心緝捕勇力過人盜聞宋尉名咸徙去先是縣南瀘源洞僻險遠城一市有李鬍子者擅技勇土人相推爲長擾害居民上官因其勢羈縻之有盜七人當刑逃匿李所纘殷往捕李攘臂而笑纘殷猝前縛李仆地出利刃加諸項李惶懼乞命須臾縛羣盜至皆伏罪李由是請奉約束供賦役一鄉以安

韓侯振字坦軒山東茌平人舉人康熙間知吉水清正廉明釐奸剔弊民安其居所獎拔多孤寒士皆以次登科第在任七年士民懷德爲建韓公書院祀之

魯昇字曉芳建昌新城人舉人康熙間任吉水教諭訓士敦品力學曲盡甄陶在任十餘年登科第有聲鄉黨者皆其受業弟子

陳銳字芝山陝西渭南人進士雍正元年知吉水前縣湯敘有虧缺上官欲移編人民適銳不忍累民以此失上官意謝病去銳平易近民推誠待士縣試童子受卷品騰如師友民有與嫂嫂爭田產者銳委曲曉譬出以至誠遂感動不復爭在官數月脫然解組

王崇山西靈石人雍正間任吉水丞質直廉明儉約自守監納賦稅役不得高下其手嘗代令催科有蠹役挾仇以抗賦傾良士崇察其誣重懲蠹役士民稱之

張鰲萬載人歲貢雍正間任吉水訓導賦性恬淡持躬端方杜門著書不干預外事與縣人士論學壘壘不倦張彤標字伊蔚山東觀城人進士雍正間令吉水聽斷根


株必盡民無遁情所賞拔士皆登科有聲城南隄工以請修未允自輸多金倡築並捐建上諭亭縣俗午日迎神驅疫爲風俗蠹形標嚴禁之在官四年擢刑部主事


徐大坤字順菴湖北大冶人乾隆五年由興國令調吉水縣有仁文書院大坤重新之捐俸置田給肄業生膏火又勸民墾種歸其田於書院縣南城隄圯前議建復未允大坤痛陳利害得報可遂築石隄衛民居明年署廬陵縣亦著循聲擢瑞州同知所築隄爲春漲圯大坤力疾復來補築尋卒於吉水初書院之興石隄之建始前明知縣徐學聚大坤先後同符並祀鄒忠介祠

寧保字嵩齡滿洲正白旗人乾隆十九年知吉水甫下車
 縣人廖某聘婦未娶婦家憎其貧以女別字他族寧保
 廉得其實撻媒氏即堂上命酒為婚出白鏹仗助之羣
 情大快寧保家世勳舊嘗自道生平得力在體認無自
 欺三字涖縣年餘卒於官以上盧志
 朱廷基山東益都人進士乾隆三十五年任吉水縣愛民
 禮士多善政於人才尤如意培植修築南門護城隄人
 稱曰朱公隄

胡晉采字易齋寧都州人舉人由山西寧武知縣改授吉
 水教諭性閒靜嚴師範月季課手自評隲訓士不責脩
 脯至今咸追思之

章裕善字竹虛浙江嘉興人舉人咸豐二年攝吉水篆夏
 淫雨籲大吏緩徵明年饑發常平倉以賑粵寇竄吉水
 城內兵餉俱缺遂被陷裕善仰藥坐堂罵賊賊愕然亦
 不加以刃入室毒發死裕善性慈厚政尙寬平其絕命
 詞云請兵無有請餉無有微末一吏空拳赤手斗大孤
 城其何能守為官不能報國是誠身有遺羞一死尙堪
 對君敢云名垂不朽又曰任碎吾屍勿傷百姓至今讀
 者悲之以上採縣志新增





70008783

吉安府志

卷十三

吉水名宦

六十四

